



Srijeda, 17. 11. 2010. godine
S A R A J E V O

ISSN 1512-7079 br. 75

Na osnovu člana 61. stav 6. i člana 110. stav 1. alineja 7. Zakona o cestama Federacije BiH ("Službene novine Federacije BiH", broj 12/10 i 16/10), federalni ministar prometa i komunikacija donosi

PRAVILNIK

O NAKNADAMA ZA KORIŠTENJE CESTOVNOG ZEMLJIŠTA

I. OPĆE ODREDBE

Član 1.

Ovim se Pravilnikom uređuju uvjeti i način korištenja cestovnog zemljišta i drugog zemljišta koje pripada javnim cestama Federacije BiH (u daljnjem tekstu: javne ceste), uvjeti i postupak ustupanja, te prava i obaveze u vezi obavljanja pratećih djelatnosti na cestovnom zemljištu, kao i prava i obaveze u vezi korištenja cestovnog zemljišta za građenje komunalnih, vodoprivrednih i drugih objekata (instalacije, cjevovodi i sl.).

Član 2.

Pratećim djelatnostima u smislu ovog Pravilnika, smatraju se djelatnosti pružanja usluga vozačima i putnicima koje se obavljaju na cestovnom zemljištu i to:

- a) ugostiteljstvo,
- b) trgovina,
- c) benzinske stanice,
- d) servisi i slično.

II. UVJETI I NAČIN KORIŠTENJA CESTOVNOG ZEMLJIŠTA

Član 3.

(1) Cestovno zemljište može se ustupiti na korištenje pravnim i fizičkim licima (u daljnjem tekstu: korisnicima) radi obavljanja pratećih djelatnosti iz člana 2. ovog Pravilnika, te za parkirališta, priključke na javne ceste, elektronske, telefonske, antenske priključke, kao i za druge vidove korištenja kojima se pružaju usluge vozačima i putnicima.

(2) Cestovno zemljište može se ustupiti i za instaliranje uređaja i opreme, građenje komunalnih, vodoprivrednih i drugih objekata (instalacije, cjevovodi i sl.).

Član 4.

Korisnik ne može, bez saglasnosti nadležnog organa za ceste iz člana 13. Zakona o cestama Federacije BiH, pravo korištenja cestovnog zemljišta i obavljanje prateće djelatnosti ustupiti trećim fizičkim ili pravnim licima, izvršiti prenamjenu korištenja, niti promjenu vrste prateće djelatnosti na cestovnom zemljištu za zemljište za koje je dobio odobrenje za korištenje.

III. UVJETI I POSTUPAK USTUPANJA

Član 5.

Nadležni organi za ceste iz člana 13. Zakona o cestama Federacije BiH će na osnovu izdatog odobrenja odnosno saglasnosti izdati Rješenje za korištenje cestovnog zemljišta i drugog zemljišta koje pripada javnim cestama, odnosno obavljanje pratećih djelatnosti na cestovnom zemljištu.

Član 6.

Fizička i pravna lica za korištenje cestovnog zemljišta iz člana 3. ovog Pravilnika, po Rješenju iz člana 5. ovog Pravilnika, obavezno plaćaju naknadu.

Član 7.

(1) Naknada za korištenje cestovnog zemljišta i drugog zemljišta koje pripada javnim cestama, odnosno obavljanje pratećih djelatnosti na cestovnom zemljištu utvrđuje se na godišnjem nivou i obračunava se:

- a) za obavljanje pratećih djelatnosti iz člana 2. ovog Pravilnika kao i za parkirališta i priključke na javne ceste, po kvadratnom metru površine;
- b) za cjevovode instalacije i vodove, po dužnom metru,
- c) za priključke (antenske, elektronske, telefonske i slično), uređaje i opremu, po komadu.

(2) Naknada za korištenje cestovnog zemljišta i drugog zemljišta koje pripada javnim cestama, odnosno naknada za obavljanje pratećih djelatnosti na cestovnom zemljištu, plaća se u konvertibilnim markama, unaprijed, u jednokratnom iznosu i visina iste ovisi o intezitetu saobraćaja, od svrhe za koju je namijenjeno cestovno zemljište i od kategorije javne ceste.

(3) Naknada za građenje komunalnih, vodoprivrednih i drugih objekata (instalacije, cjevovode i sl.) se za prvu godinu plaća u punom obračunatom iznosu, a za svaku narednu godinu naknada se plaća u vrijednosti od 50% obračunatog iznosa za prvu godinu korištenja.

Član 8.

(1) Rješenje za korištenje cestovnog zemljišta i drugog zemljišta koje pripada javnim cestama sadrži:

- a) ime i adresa donositelja rješenja,
- b) ime i adresa korisnika cestovnog zemljišta,
- c) jedinstveni matični broj korisnika, odnosno identifikacijski broj korisnika,

- d) veličinu cestovnog zemljišta izraženu u odgovarajućoj mjernoj jedinici koja se daje na korištenje,
- e) svrhu u koju će se koristiti zemljište,
- f) intezitet saobraćaja na javnoj cesti na lokalitetu na kojem se ustupa cestovno zemljište,
- g) visinu naknade na godišnjem nivou i visinu naknade u narednim godinama,
- h) uvjete i način plaćanja naknade kao i druge odredbe.

(2) Lični podaci korisnika iz prethodnog stava ovog člana mogu se koristiti isključivo za potrebe prinudnog ostvarenja dospjelih potraživanja na osnovu Rješenja za korištenje cestovnog zemljišta i drugog zemljišta koje pripada javnim cestama.

Član 9.

(1) Po donošenju i zaprimanju Rješenja za korištenje cestovnog zemljišta i drugog zemljišta koje pripada javnim cestama korisnik je obavezan dostaviti dokaz o uplati naknade donosiocu rješenja u roku od petnaest dana od dana zaprimanja istog.

(2) Naknada po Rješenju iz člana 5. ovog Pravilnika obračunava se od dana donošenja Rješenja do 31.12. tekuće godine, a za svaku narednu godinu korištenja cestovnog zemljišta nadležni organ za ceste iz člana 13. Zakona o cestama Federacije BiH će donijeti novo Rješenje u kojemu je obračunski period od dana 01.01. do 31.12. odnosne godine.

Član 10.

Sredstva ostvarena od naknada za korištenje cestovnog zemljišta i od obavljanja pratećih djelatnosti, uplaćuju se na račun nadležnih organa za ceste iz člana 13. Zakona o cestama Federacije BiH.

IV. PRELAZNE I ZAVRŠNE ODREDBE

Član 11.

Prema korisniku koji ne izvršava obaveze iz Rješenja za korištenje cestovnog zemljišta nadležni organi za ceste iz člana 13. Zakona o cestama Federacije BiH pokrenut će izvršni postupak.

Član 12.

Ugovori i Rješenja o korištenju cestovnog zemljišta zaključeni sa korisnicima cestovnog zemljišta prije stupanja na snagu ovoga Pravilnika, ostaju na snazi do isteka ugovorenog roka, nakon čega će se donijeti rješenje o korištenju cestovnog zemljišta u skladu s ovim Pravilnikom.

Član 13.

Ovaj Pravilnik stupa na snagu osmog dana od dana objave u "Službenim novinama Federacije BiH".

Broj 08-02-2-1444-2-0/10
8. novembra 2010. Godine

Mostar